

YUS DIS

Yus Dis, Zaj 8, 13 thiab 15

Yus Dis tus yeeb yam.

8 : 1 - 8.

- 8** 1 Hnub ntawd, Yus Dis hnov tias cov tub rog His Xas Lais nyob Npes Thus Lias yuav tiv tsis tau cov yeeb ncuab ntxiv. Yus Dis yog Mes Las Lis tus ntxhais. 2 Yus Dis tus txiv hu ua Mas Nas Xes. Nws nyuam qhuav tuag thaum lub caij sau nplej. 3 Yog thaum nws saib cov tub zog pav tes nplej, mas nws raug tshav ntuj kub nws dhau, ces nws pw nws cia li tuag nyob hauv lub tsheej Npes Thus Lias. Lawv muab nws faus nrog nws cov poj yawm txwv koob nyob hauv daim teb nyob ntawm Dos Tais thiab Npas Las Moos kis nruab nrab. 4 Ces Yus Dis ua poj ntsuam. Nws nyob hauv nws lub tsev li qhov qub peb xyooz thiab plaub lub hlis. 5 Nyob saum nws lub ru tsev nws tau npaj ib kem tsev. Nws pw nyob ntawd ntau. Nws hnav ntaub tsaj, nws hnav tsoos tsho xws li cov neeg coj xyom. 6 Niaj hnub Yus Dis ua cov kab ke yoo, vim nws ua poj ntsuam. Tsuas yog cov hnub Xas Npas Tos thiab tej hnub lom zem uas cov His Xas Lais nqaum paj nqaum nruas mas nws thiaj tsis yoo mov xwb. 7 Yus Dis yog ib tug poj ntsuam zoo nkauj, nws muaj tus yeeb yam zoo nyiam. Thaum Yus Di tus txiv Mas Nas Xes tuag, tus txiv tso nyiaj tso kub, tso cov ntxhais txib tub txuas, tso tej pab tsiaj, tej thaj liaj teb ntau rau nws tus poj niam. Yus Dis nyob hauv ib lub tsev

muaj lub cuab tam loj.

8 Tab sis Yus Dis tsis kheev leej twg tuaj zes nws vim nws hwm Tswv Ntuj zoo.

Tsoom pej xeem cav txog Yus Dis.

13 : 17 - 19 + 15 : 9.

- 13** 17 Tas tsoom pej xeem pom Yus Dis nqa Hos Los Fes lub taub hau tuaj nyob hauv lub tsheej Npes Thus Lias, mas sawv daws pe Tswv Ntuj thiab qw suab cav txog Yus Dis tias : "HUAB TAIS tau foom hmoov zoo rau koj. Nws muab nws lub zog rau koj kom koj yuam tau peb cov yeeb ncuab. 18 Tus HUAB TAIS Tswv Ntuj nyob siab tau foom lus zoo rau nws tus ntxhais Yus Dis. Nws tau foom ib lo lus zoo dua tas txhua leej poj niam nyob ntiaj teb no, peb cav txog tus HUAB TAIS tsim lub ntuj lub teb, vim nws tau pab koj txiav tus tswj peb cov yeeb ncuab taub hau. 19 "Yus Dis hnub no, HUAB TAIS tau ua kom koj lub npe nto moo loj. Tas lub qab ntuj neeg yuav cav txog koj tsis muaj caij kawg, lawv yuav nco ntsoov txog HUAB TAIS lub hwj huam mus li. Yus Dis koj tsis tau ntshai raug txoj kev txom nyem, vim koj xav pab koj haiv neeg uas ntxhov siab thiab raug luag hiam.

- 15** 9 Yus Dis koj tau npo peb ntawm txoj kev tuag. Koj yog Yes Lus Xas Les lub koob meej. Koj tau mloog Tswv Ntuj coj koj kev. Koj yog His Xas Lais txoj kev kaj lug. Koj yog tus ua kom peb haiv neeg muaj koob meej."

ES THES

Es Thes, Zaj 13 thiab 14

Mas Ntos Kes thov Tswv Ntuj.
13 : 8 - 11 + 15 - 17.

13 8 Thaum cov His Xas Lais nyob txim nyob Npas Npis Los teb, luag hais lus xaiv txog cov His Xas Lais rau tus vaj Npas Npis Los. Tus vaj yuav muab cov His Xas Lais tua kom tas huv tib si. Ces ib tug His Xas Lais hu ua Mas Ntos Kes thov Tswv Ntuj zoo li no :

9 "HUAB TAIS, HUAB TAIS, koj ua Vaj muaj hwj huam loj tas nrho. Tas ib puas tsav yam zwm rau koj. Yog vim koj txiav tias koj yuav cawm His Xas Lais, mas tsis muaj leej twg yuav tiv tau koj.

10 Koj yog tus tsim lub ntuj lub teb thiab tas ib puas tsav yam nyob hauv lub sim ceeb no.

11 Koj yog sawv daws tus Tswv. Tsis muaj leej twg yuav yeej tau koj lub hwj xyeej."

15 Ua li mas, zaum no, HUAB TAIS Tswv Ntuj, Has Nplas Has tus Tswv Ntuj, thov koj hlub koj haiv neeg. Peb cov

yeeb ncuab xav muab peb tua, lawv xav rhuav koj tsoom pej xeem huab hwm. 16 Haiv neeg no yog haiv neeg koj twb tau cawm ntawm Hais Nkws Tos teb los lawm. Koj tsis txhab thuam koj haiv neeg.

17 Koj mloog kuv lo lus thov koj.

Koj ua siab zoo rau koj cuab koj yim. Niaj hnub peb quaj peb nyiav.

Thov koj ua kom peb nyob luag ntxhi. HUAB TAIS, koj ua kom peb muaj txo sia nyob, ces peb yuav cav txog koj lub npe. Peb tus HUAB TAIS Tswv Ntuj, peb yog cov neeg hu nkauj cav txog koj, koj tsis txhab kaw peb lub ncauj mus li."

Es Thes thov Tswv Ntuj.
14 : 1 + 3 - 5 + 12 - 14.

14 1 Tus poj vaj Es Thes nrhiav kev nraim ntawm lub txim uas yuav tuaj raug nws. 3 Nws nrhiav chaw nraim nyob hauv HUAB TAIS Tswv Ntuj. Nws yuam nws lub cev. Nws hle nws cov plaub hau cuav pov tseg, nws muab tso puv tej chaw uas niaj hnub lawv pom nws hnnav zam zoo. Es Thes thov His Xas Lais tus HUAB TAIS Tswv Ntuj li no :

4 "HUAB TAIS, koj tib leeg yog peb tus Vaj ! Thov koj tuaj pab kuv mas ! Vim kuv nyob kuv ib leeg xwb, kuv tsuas vam txog koj tuaj pab kuv. Txog lub caij kuv yuav tuag los kuv txoj sia yuav dim, los kuv tsis paub ! 5 HUAB TAIS, thaum kuv tseem nyob hauv kuv niam xub ntiag kuv twb tau kawm tias yog koj xaiv His Xas Lais nyob hauv tas txhia haiv neeg los, yog koj xaiv peb cov yawg koob nyob hauv lawv cov neeg txheej thaud los kom lawv ua koj tug mus li. Koj tau qhia tau coj lawv xws li koj yeej ib txwm cog lus. 12 HUAB TAIS, nyem no peb raug txom nyem, thov koj nco ntsoov tuaj pab peb ! Thov koj txhab zog rau kuv. HUAB TAIS Tswv Ntuj, uas koj lub hwj chim kav tas txhia leej muaj hwj chim.

13 Thaum kuv nyob ze tus tsov, thov koj pub tswv yim rau kuv kom kuv txawj hais lus ua kom tus tsov siab nqig. Thov koj ua kom nws lub siab tig mus ntxub peb tus yeeb ncuab, kom peb tus yeeb ncuab nrog nws cov neeg lawv sawv daws ploj mus. 14 Thov koj cev tes tuaj cawm peb. HUAB TAIS, koj tuaj pab kuv, vim kuv nyob kuv ib leeg xwb, kuv tsuas tshuav koj ib leeg xwb yog tus yuav tuaj pab kuv.